



## **Sacerdos Aut Sanctus Aut Reprobus**

**Dufrène, Maximilian**

**Augustæ Vindelicorum, 1743**

Caput. 3. Quòd Nemini certò constet, se Dei gratiâ in præsens potiri, non satis causæ esse, ad nos revocandos à familiari & jucunda illius consuetudine.

---

[urn:nbn:de:hbz:466:1-60483](https://nbn-resolving.de/urn:nbn:de:hbz:466:1-60483)

generosa , ad quam confidentia , atque hilas erigat.

## CAPUT III.

Quòd nemini certò constet , se DEI  
gratiā in præsens potiri , non satis causæ esse , ad  
nos revocandos à familiari , & jucunda illius  
consuetudine .

**Q**uemadmodum , teste D. Joanne , proprium charitatis est , animos expedire à timoris angustiis , ( Ep. 1. c. 4. ) *Timor non est in charitate , sed perfecta charitas fors mitit timorem ;* sic è contrario usitatum , & solenne timori est , perturbare charitatis dulcedinem ; triplex autem videtur esse posse in servorum DEI animis hujusmodi timor : timor nimirum , ne divinâ gratiâ in præsens careant : ne ab illa aliquando excidant : neu sinè illa suprēmum diem obeant . Et sanè dubitari minimè potest , quin ab uno quoque ex commemoratis timoribus nostri erga DEum amoris confidentia , & suavitas perturbetur . Perturbatur à primo : cùm enim amicitia nihil aliud per Aristotelem sit , nisi ( l. 8. Eth. c. 2. ) *Amor mutuus non latens ;* quonam pacto jucundè , fidenterque acquiescere in DEI amicitia ego possim , cuius amor me latet ; vereárque , ne odio potius illi sim , quàm amori ? Perturbatur à

M 4

secun-

secundo : inhærens quippe animo boni cū  
jusvis amittendi timor minūs jucundam il-  
lius possessionem facit : quantóque bonum est  
charius, tantò ejus jacturæ formido plūs cru-  
ciat. Perturbatur denique à tertio , quia mi-  
grare ad æternitatem inimicum DEI , talém.  
que permansurum necessariò , quamdiu illa  
duraverit , malum est tam ferale , omném.  
que alium cruciatum exuperans , ut & te-  
nuis ejus suspicio amarissimo felle confun-  
dere cujuslibet gaudii dulcedinem queat.  
Ex altera verò parte sat videtur causarum  
suppetere , cur prædicti timores ab unoquo.  
que hominum concipi debeant. Primus ,  
quia ob exiguum interioris nostri statūs no-  
titiam nemini certò constat , seu plenam  
præteriorum scelerum remissionem efficaci  
pœnitentia à se impetratam ; seu nullum  
deinceps novum crimen admissum. Unde  
illa est Salomonis sententia , ( Eccl. c. 9.)  
*Nescit homo , utrùm amore , an odio dignus sit :*  
& illud Ecclesiastici monitum , ( c. 5.) *De pro-  
pitato peccato noli esse sine metu.* Secundus ,  
propter notam plūs nimiò humanæ naturæ  
pronitatem ad malum , & tristia multorum  
exempla , quos post vitam diu persanctè  
productam , in foedissima novimus corruisse  
flagitia. Tertius demum , ob impenetra-  
bilem nostris mentibus divinorum judicio-  
rum altitudinem , & quòd nulli mortalium  
secundùm communem providentiam liquere  
DEus voluit , utram ipse ad classem , electo-  
rūmne

rūmne, an reproborum pertineat? Accedit  
huc præterea, quòd nonnulli asceticæ vitæ  
magistri id genus timores, quasi ad solidi-  
orem animæ humilitatem, interiorémque  
sui custodiam perutiles, non parùm com-  
mendant, altiusque defigere in animis ho-  
minum student, tragica oratione exagge-  
rando humanæ conditionis fragilitatem, dif-  
ficultates assequendæ salutis, exiguūmque  
illorum numerum, qui eam assequuntur. Un-  
de fit, ut permulti vel eorum rationibus  
moti, veritique, ne nimiæ laxitatis, &  
præfidentiæ sit diversa sentire, continuos  
inter animi angores vitam traducant; vel  
saltem ambigi, incertique hærent neque  
existimantes una ex parte idoneam sibi cau-  
sam adesse, ita se discurciandi; neque ex  
altera audentes, strictioribus id genus do-  
ctrinis libero spiritu obsistere.

2. Ast ego commiserans tum hasce eo-  
rum angustias, tum impedimenta, quæ in-  
de illis proveniunt, ne confidenter & ami-  
corum ritu cum DEO agant; demonstrare  
statui, suprà dictos tres timores reprimen-  
dos potiùs, quàm fovendos suo in animo esse  
ab hominibus, qui ex professo Christianæ  
perfectioni, & divinæ charitati operam na-  
vant, idque dupli ex causa: prima, quia  
hujusmodi homines nihil habent, cur eo-  
rum ullo perturbari meritò debeat: alte-  
ra: quia ex eorum quolibet plus possunt  
incommodi, quàm utilitatis percipere. Qua-

M 5

rum

rum causarum vim circa primum de divina  
fors præsenti inimicitia timorem hic conti-  
nuò expendam, idem circa reliquos duos in  
sequentि capite acturus.

3. Utque ab earum altera initium desu-  
mam; quæro ex iis, qui volunt DEI servos  
metuere, ne fors in præsens gratiâ, amici-  
tiâque illius careant; quidnam spiritualis  
emolumenti ejusmodi trepidatio allatura il-  
lis sit? Dicent, nî fallor, humiliores eos red-  
dituram, & sollicitos magis. Humiliores  
quidem, quatenus prohibebit, ne inaniter  
glorientur, & contenti statu suo sint: magis  
verò sollicitos, quia fodiendis instar stimuli  
eos assiduè incitabit, ut novis pœnitentiæ  
actibus curent suam cum DEO amicitiam  
certiorem reddere. Ità profectò complures  
sentiunt, atque hinc causas ducunt prædi-  
ctæ anxietatis laudandæ, & suadendæ;  
suam insuper confirmantes sententiam am-  
biguitate, in qua nos DEUS circa cœlestis  
hujus boni possessionem reliquit: utilius  
nempe nobis existimans, (ceu in dè ab ipsis  
colligitur) si, quantum ad illam, semper  
incerti, & pavidi essemus. Sed pace illo-  
rum dictum sit, in prima ex prædictis utili-  
tibus afferenda videntur, Christianam hu-  
militatem cum propriæ sortis displicentia,  
fastumque, & arrogantiam cum læta ejus-  
dem approbatione confundere: parùm ad-  
vertentes, nullum inter ista duo necessa-  
rium, & naturalem nexum, quin latum  
potius

potius discrimen intercedere. Fastus quippe, & animi tumor, si sacris Doctoribus credimus, non in eo positus est, quod aliquis divina in se munera advertat, deque iis sibi met gratuletur; sed potius, quod ejusmodi bona propriæ virtuti attribuat, sequere ob ea magni aestimet, & aliis anteponat. Ita plenè docet D. Thomas, nullius culpæ affinem pronuntians, qui bona sua agnoscat, & magni pendat: (2. 2. quæst. 132. a. 1.) Quod aliquis bonum suum cognoscat, & approbet, non est peccatum: confirmansque suum dictum iis Apostoli verbis: (1. ad Cor. 2.) Nos autem non spiritum hujus mundi accepimus, sed spiritum, qui ex DEO est, ut sciamus, quæ à DEO donata sunt nobis. Ita D. Augustinus virtutem potius, quam vitium censet, prædicationem collaborum sibi à DEO munerum. (Serm. 28. de verb. Ap.) Non est arrogantia, sed fides, prædicare, quod acceperisti: non superbia, sed devotio. Ita D. Bernardus observans, non reprehendi ab Apostolo, qui gloriatur, & gaudet, sed qui gloriatur quasi de re penitus sua, & quam nemini alteri debeat. (de dilig. DEO) Non ait simpliciter, quid gloriaris? sed quid gloriaris, quasi non acceperis? Ut afferat, reprehensibilem, non qui in habitis, sed qui tanquam in non acceptis gloriatur. Ubi etiam subdit, divinorum in se donorum cognitionem usque adeò culpan dam non esse, ut sit verius necessaria, & laudabilis. Utrumque ergo scias, necesse est, & quid sis, & quod à te ipso non sis, ne aut omni-

no

*uo non glorieris, aut inaniter glorieris.* Ità postremò D. Teresia, quæ adhortans animam peculiari aliquo DEI beneficio inter ordinum decoratam, ad debitas ipsi grates redendas. (in vita c. 10.) Ne, inquit, pensi habeat quædam humilitatis genera, de quibus cogito agere inferius: qualis nonnullorum judicio est cogitationem avertere à donis, quibus Deus nos interdum dignatur. Intelligamus, quod res est, hujusmodi munera sine ullo priori nostro merito à divina liberalitate nobis conferri, gratię ideo illisimus. Nisi enim nota sint nobis beneficia, qua accepimus; neutquam excitabimur ad eum amandum, à quo illa accepimus. Certè tunc amare impensius quempiam solemus, cùm præsentiorem habemus illius erga nos beneficiale memoriam. Si ergo licet mihi, imò & in meriti loco apud DEum est, recordari, quod ipse me in lucem produxerit, & sui sanguinis pretio redemerit; quidni animadvertere pariter liceat, quod, cùm olim de terrenis, profanisque rebus confabulari solerem; nulla mihi illius ope jam sint, nisi de illo colloquia? Enim verò, quæ hominum naturalis conditio est, impossibile mihi factu videtur, ut magna pro DEO audeat, qui peculiariter se ab eo diligi nesciat. Adeò quippe proclivi ad terrena, & caduca ingenio sumus; ut agrè à quibuslibet præsentis vitæ bonis alienum gerere animum possit, qui minimè agnoscat aliquod futurorum pignus se habere. Hactenus consultißima illa rerum spiritualium magistra, addens inferius, dæmonem suo judicio multum laborare, ut animas orationi, vitæque inte-

interiori deditas ab ampliori in ea faciendo progressu , falsis quibusdam de humilitate opinionibus retineat. His igitur positis , fac , aliquis persuassimum habeat , DEO charum in præsens se esse , neque ullis , quantum ad hoc , sollicitetur inquietis timoribus , sed latus , & gestiens , tanquam de singulari beneficio divinæ bonitatis grates persolvat , ubinam hic ulla species , ullum- ve vestigium superbiæ ? Aut quidnam aliud contrariæ suspiciones , anxietatésque face- rent , nisi quòd perturbarent hominis ani- mum ; nisi quòd minùs jucundum ei redde- rent orationis , & consuetudinis cum DEO usum : nisi quòd in eo spiritualium lætitiam , & fervorem charitatis minuerent ?

4 At ( ab adversariis responderi audio ) si quis miserum se existimaret , minùsque interiori statu suo contentus foret , is sanè hu- milior animo foret . Atqui ità respondere nihil profectò est aliud , quām in observa- tam paulò antè vocum , & sensuum confu- sionem revolvi : pro eadem re accipiendo parùm quempiam interiori suo statu conten- tum vivere , & animo humilem esse . Quòd si admitteretur pro vero , næ parùm humili sanctissima DEI parens fuisset , cùm exul- tavit spiritus ejus in DEO salutari suo : quia fece- rat sibi magna , qui potens est , adeò ut propte- rea beatam dicturæ illam essent omnes generatio- nes . Nec non universi item cœlites existi- mari parùm humiles possent , utpote qui & suam

suam certò agnoscunt , absolutissimam felicitatem , & plenissimo in eo gáudio acquiescent. Contrà verò nemo humilior damnatis ad inferos foret : cùm nemo in terris æquè ac illi se miserum fateatur , & omni prorsus bono carentem. Non igitur Christianæ humilitatis perfectio in prædicta sui statûs displicentia consistit ; sed in eo verius, ut ea homo suspiciens , quæ à se ipso habet, propriéque sua sunt , abjectissimum sese , ac miserrimum , & omnis funditus boni vacuum existimet : quamvis alioqui multa in se agnoscat collata sibi à DEO munera, quæ summo in pretio , próque eximia felicitate sua habeat , & quorum causâ peramantes supremo largitori gratias perpendat. Nempe hæc illa est gloriatio , & exultatio in DEO , commendata à D. Paulo , ubi scripsit , ( 2. ad Cor. 10. ) *Qui gloriatur, in Domino glorietur.* Qui proinde , etiam ubi magnificentissimè de se loquitur , dicens : ( ibid. 12. ) *Nihil minus fui ab his, qui sunt supra modum Apostoli;* nihili tamen sibi nomen , ac locum usurpat , protinus subdens , *tamen si nihil sum :* & alibi adhuc fusiùs eandem tum divinorum in se munerum præclararam estimationem , tum omnino dum sui contemptum declarat his verbis : *Ego sum minimus Apostolorum, qui non sum dignus vocari Apostolus.* *Gratiâ autem DEI sum id, quod sum, & gratia ejus in me vacua non fuit, sed abundantius*

illit

illis omnibus laboravi. Non ego autem, sed gratia DEI mecum. (1. ad Cor. 15.)

s. Haud tamen acquiescunt timoris patrini, reponentes, posse quidem fieri, ut quispiam supernaturalia sua bona, & animadvertis, & plurimi faciat, nihil inde ad vanam sui aestimationem inflatus. Sed sapientiam ejusmodi non nisi paucorum decus esse, qui in Christiana humilitate, & demissione animi profundas radices jam egerint, neque idcirco ab iis quoque presumendam, quorum virtus nondum ad aequalem firmitudinem, soliditatemque adolevit. Durum sanè hominum genus, qui spiritualem lätitiam, pacemque animi à potiori famulorum DEI parte, nempe ab iis omnibus, qui ad extinctionem, perfectamque virtutem nondum pervenere, proscribendam existimant. At benè, quod præstantissimus Evangelicæ sapientiae Magister Paulus Apostolus alios longè sensus, aliásque institutiones è tertio cœlo detulit. Nisi forte sinè ulla probabilitatis specie fingamus, omnes universos vilipensis Ecclesiæ Neophytes in ipsismet suæ fidei primordiis perfectos fuisse, adeò ut tutò inculcare illis posset; (c. 3.) *Gaudete in Domino semper, iterum dico, gaudete*: perfectosque item omnes, qui ad Christum nuper conversi Thessalonicæ erant, ut iis similiter commendandum putaret, (I.c. 5.) *Semper gaudete: in omnibus gratias agite*. Nam quæ, rogo: perpetuæ illius in Domino lætitiae,

titiæ , & gratiarum actionis causa utrisque esse poterat, nisi, quod persuasum habent, assiduèque recogitarent, DEO charos, atque amicos se esse? Moneant ergo, si libet, cauti isti animarum institutores, tantum illum fidei præconem, ne adhuc crudam, & teneram recentium Christianorum sobolem tam impensè, fidentérque ad exultandum, & quidem perpetuò de supernaturali sua felicitate exhortetur. Timeri siquidem haud immerito posse, ne eorum non nulli occasionem inanis gloriolæ, arrogantiæque sumant. Novi id, novi satìs, respondebitorum monitioni Sapientissimus gentium Doctor. Sed discrimin hujusmodi non adeò vitatu difficile cuilibet, vel mediocris prudentiæ, ac virtutis homini est; ut declinandi illius causâ necesse sit, aut expedit, perpetuis conscientiæ angoribus sese ultrò cruciare, qui animi vigorem debilitant, proficiendi alacritatem extinguant, amicam cum DEO conjunctionem impedian, nec aliam demum humilitatem producant, nisi servilem, tetricam, inquietam, miseræque fontium in tartaro animarum humilitati consimilem. Certè si nihil aliud in spirituali vita curandum magis esset, quam omnes vel remotas superbiæ occasionses defugere, ac proinde expedire cuvis, pessimè semper de se ipso opinari; nimirum quam inconsultè conarentur animarum rectores eas vanis, ceu persæpe contingit, admissorum cri-

criminum dubiis, & suspicionibus exagatas, in tranquillum redigere: cùm potiùs cohortari easdem deberent, ad suos illos scrupulos, pavorésque, ceu præsentissima superbiæ amuleta intra conscientiam fovendos: & curandum, quò ad fieri potest, ut in quovis vitæ actu sibi videantur DEum graviter offendisse, illiúsque ideo gratiâ carere. Consectarium procul dubio absurdissimum, quódque nequeat, nisi ex absurdiori principio, deduci.

6. Perspicuè igitur demonstratum videatur, anxious id genus timores de præsenti intra conscientiam capitalis culpæ reatu, ad hominem insolita humilitate custodiendum necessarios non esse. Videamus porrò, num saltem ei utiles sint ad DEI amicitiam recuperandam, ubi forte illam occulti alicujus criminis causâ amisisset. Et quidem, si de profanis, ac solutioris vitæ hominibus sermo esset, haud gravatè id faterer. Cùm enim, qui ejusmodi sunt, obstrictam non rarò gravi scelere conscientiam vel ignorantes habeant; à concepto tam periculosi sui statûs timore stimulari possunt, ad ejus medium in pœnitentiæ Sacramento quærendum. At, cùm nostra hæc omnis tractatio ad homines dirigatur, spirituali vitæ jam diu addictos, qui & suæ ad DEUM conversionis initio accurata præteriorum quorumvis criminum exhomologesi conscientiam ritè expiarunt; eandémque in subsecutis dein-

N

ceps

ceps confessionibus , quandocunque usus ferret , sedulò repurgare institerunt , neque jam dudum lethale ullum crimen admiserunt , imò illud , quasi extremum malorum gravissimè perhorrescunt , quóque maximo possunt , studiō devitant : nitentes præterea ulteriores semper , ulteriorésque facere in conjunctione cum DEO , atque animi puritate progressus ; ad quas demum novas , & solertiores divinæ redintegrandæ amicitiæ curas ab illius amissæ dubio , atque metu incitari illos posse dicemus ? Num ad conscientiam semper subtiliùs examinandum , & ad repetenda , quoties Sacramentum pœnitentiæ instaurant , quasi minùs disertè explicata , præteritarum confessionum delicta : sine ullo fine , atque modo novas assiduè comminiscendi criminum circumstantias , déque exactioribus aliis anteactæ totius vitæ confessionibus cogitandi ? At si id facere instuant , prudens quilibet pœnitentiæ Sacramenti administer superstitionæ illos diligentiæ coarguet : jubebitque supervacuam ejusmodi inanum animadversionum , & sollicitudinum turbam missam penitus facere : neque de culpis , quas semel , iterúmque ad Sacerdotis aures detulerunt , anxios ultrà esse , sed eas pro legitimè jam enuntiatis , & remissis habere : contemptim explodendo , quasi larvas sine corpore , quidquid temerè conceptarum suspicionum menti occurrit . At quas igitur alias divinæ gratiæ asse-

afferendæ artes ab eo timore impellentur? Num ad sua crimina, quām celerrimè etiam extra Sacramentum, ex DEI offensi amore detestanda: quo eorum scilicet veniam, si nondum fortè assecuti essent, hac certius ratione assequantur? Sed enim, qui divinæ confuetudini, & charitati sedulò vacat, quales animæ sunt ( quibuscum hoc in libro agimus ) neutquam indiget à prædicto timore stimulari ad suorum detestationem facinorum. Nempe hic, ceu in peculiari, proprioque capite infrà explicabimus, et si instar Mariæ Magdalenæ certissimè sciret, præteritas omnes culpas sibi esse à DEO condonatas; pergeret tamen nihilo seciùs, ac priudem eas detestari, non quidem divinæ gratiæ certius obtinendæ causâ, sed puræ charitatis vi impulsus: nimirum ex dolore, quod iis perpetrandis DEUM infinitè amabilem, sibique super omnia adamatum offendenterit. Qua ratione concepti pœnitentiæ actus perfectiores solent esse, & quantò minus suum bonum respiciunt, tantò certius consequuntur. Quocirca ex quacunque demum parte rem intueamur, præsentis divinæ inimicitiae timor nihil utilitatis hujusmodi animabus parit: neque ullam vim ferè habet, nisi eas inquietandi, efficiendique, ut in supervacuis circa suum statum præteritum curis cogitationes suas occupent, quas multò fructuosiùs in acquirendæ ulterioris perfectionis studio occu-

parent. Effectus, quām ipsis noxios, tam malignis hostis tartarei votis consentaneos: qui, teste D. Teresia (*cast. inter. c. 10. man.*, 6.) pro ingenti lucro suo habet, si animas videat interioribus molestiis perturbatas, & quietis expertes ratione impedimenti, quod ejusmodi perturbationes illis afferunt, ne DEO amando, & laudando totas se impendant.

7. Sed quid argumento respondebimus, quod adversarii ad prædictas utilitates confirmandas ex omnimoda obscuritate, atque ignorantia desumunt, in qua nos DEUS circa nostram secum amicitiam vel inimicitiam reliquit: non alia profectò, ut legitimi colligi putant de causa; nisi quia utilius nobis censuerit, si, quantum ad hoc, usquequaque incerti, dubiique, & metuentes essemus? Tria sunt, quæ opponere illi possim responsa, & unumquodque ad ipsius refutationem per se satis idoneum. Nego itaque primitus: DEUM voluisse, ut de præsenti sua amicitia penitus nescii, incerte ageremus. Esto quippe metaphysica, & omnimoda nostræ hujus sortis certitudine careamus; possumus tamen, ut paulò inferius monstrabo, moralem de illa certitudinem consequi: notitiam nimirum, & persuasionem firmis adeò rationibus nixam, ut nullum anxiis, & meticolosis de opposito dubitationibus locum relinquat. Quorum abigendarum cum facultatem DEUS

no-

nobis providerit , quonam pacto ritè argui potest , voluisse , ut ad majorem nostram utilitatem perpetuò in nobis hærerent ? Præterea , undenam compertum adversarii habent , veram , germanāmque rationem , cur DEus absque summa hujus rei certitudine nos reliquit , fuisse , quia ejus privatio merè per se ipsam spectata nobis foret utilior ? Ego sane id inficiari nil dubito : cùm observato solenni ipsius ritu ducenti nos , quamdiu in terris agimus , per obscurum fidei tramitem , aliam posse mihi videar magis propriam , prædicti effèctus causam afferre : nempe quòd noluerit , manifesta assidue miracula edere , revelando unicuique mortalium supernaturalē suæ animæ statum : quod faciendum necessariò erat , ut certissimam , & omnino indubitatam quisque haberet de sua cum illo amicitia scientiam . Qua eadem de causa neque sensibile cum animabus vitâ fundis commercium , rerūmque divinarum visiones , & alia id genus ostenta quotidiam rem esse , ac promiscuam omnibus voluit : quamvis dubitari nequeat , quin permultis magno hæc adjumento , sive ad emergendum è vitiis , sive ad ampliorem in vita spirituali profectum fuissent . Cæterū , fac , homines universos quām certissimè exploratum habere , quòd amici DEI sint . Quidnam , rogo , detrimenti hinc perciperent sive ii , qui tales essent ,

N 3

sive

sive alii , qui minimè essent ? Nihil profecto secundi : talis enim scientia acres potius illis stimulos adderet , ad quærendum sollicite bonum , quô carent ; sed neque priores , utpote qui majori propterea cum alacritate ad DEI famulatum incumberent , & loco supervacuæ anxietatis circa præsentem sūrum statum curas omnes converterent ad eum , qualem esse tunc lætum , atque optabilem vident , in reliquam porrò ætatem servandum . Certè sancti illi viri , quos per disertam revelationem de præsenti secum amicitia certiores DEus fecit , usque adeò supernaturalem id genus notitiam spirituali suo profectui minus utilem arbitrati non sunt , ut pro ea , tanquam pro singulari beneficio amantissimas dīvinæ bonitati grates rependerent . Adde ( sítque hæc tertia responsio ) quòd pleraque etiam Christianæ Religionis mysteria , ad majus fidei meritum obscurissima DEus esse humanis mentibus voluit ; nec tamen , quasi utilitatis suæ improvidos damnat , qui sedulo humanæ rationicationis nisu , atque studio , quantam possunt plurimam iis affundere claritatem conantur . Ergo , etsi utilius nobis foret , metaphysica , & summa certitudine , utrum DEI amici simus , nescire ; non tamen hinc sequeretur , quin summa adhuc quæri utiliter , & laudabiliter possit , quam habere in præsenti vita fas est , circa id certitudo : cuiusmodi est , quam moralem appellant , non

non omnino infallibilis illa quidem , sed tam  
men sufficiens ad hominis animum extra in-  
quietas , & meticulosas dubitationes ponen-  
dum.

8. Et hæc dicta sint ad probandum , debe-  
re eos , qui intimæ cum DEO conjunctiōni  
student , abigere potius , quàm fovere in-  
quietas suspicione s , & formidines , ne exo-  
si illi sint , tanquam affectus detrimenti am-  
plius , quàm utilitatis sibi allatu ro s . Su-  
perest jam , ut probem , debere idem ab iis  
fieri , ob alteram quoque duarum ratio-  
num , quas initio attuli , quia nimur um  
plus causæ habent , cur ejusmodi metus in  
se temerarios , & fuitiles , quàm cur justos ,  
& probabiles credant . Neque huic rationi  
adversantur , quæ objecta sunt superiùs è  
sacris literis loca . Nam incipiendo ab illo  
Ecclesiastici monito : *de propitiato peccatonoli esse*  
*sine metu* ; particula de non videtur habere ibi  
vix præpositionis *circa* , ita ut sensus sit , ne  
timoris expers sis circa peccatum , quamvis  
cæteroqui jam remissum : sed æquivalere  
potius præpositioni *propter* , quasi dicatur :  
non quia peccatum tibi remissum jam est ,  
securo esse animo debes , sed cavere , ne  
iterum pecces . Talis , inquam , magis pro-  
pria esse illius moniti significatio videtur :  
tum quia , si peccatum jam remissum esse  
constat , nulla superest ratio , imò neque  
vis , & facultas metuendi , ne remif-  
sum non fuerit ; tum ratione verborum

N 4

pro-

protinus subsequentium ; Neque adjicias peccatum super peccatum ; & ne dicas : miseratio Domini magna est , multifudinis peccatorum meorum miserebitur : sive , ut in textu Græco legitur : de propitiatione ne sis sine metu , ut adjicias peccata peccatis. Quæ verba sat aper- tè indicant , moneri ibi hominem , qui pec- cavit , ne , quia condonatum sibi à DEO est præteritum crimen , pergit sine ullo metu alia committere , tanquam certus de impetranda illis quoque à DEO venia. Si quis tamen adhuc contendat , prædictum locum ita esse accipiendum , ut timor , & sollicitudo ibi commendetur circa ipsum crimen jam remissum ; neque hoc admisso sequeretur , objectum , & materiam timo- ris debere esse , quod incerta , & ambigua ipsius sit remissio. Cùm , quamvis certissima hæc sit , sat idoneam tamen causam timen- di suppeditent pravi effectus peccati , etiam post ejus condonationem remanere in ani- mo soliti : veluti pœnæ luendæ reatus , vi- tiosique habitus peccando contracti , & ad nova peccata impellentes : de quibus pro- pterea , quām penitissimè fieri potest , abo- lēndis sollicitos , inque metu esse nos con- venit. Quod verò ad eam Salomonis sen- tentiam spectat : *Nescit homo , utrum amore , an odio dignus sit , etsi accipienda non esset de æterna prædestinatione , vel reproba- tione hominis , prout à D. Bernardo (Serim. I. de Septuag. ) accipitur , sed de præsenti ejus.*

eiusdem amicitia, vel inimicitia cum DEO, possum tamen cum pluribus, & gravissimis peccatoribus dicere, solam ab ea denegari homini prorsus certam, & infallibilem de sua cum DEO amicitia scientiam: non verò persuasionem quoque animi, practicè, & moraliter certam: qua homo nimis tranquillè, fidenterque DEI amicum se credit; ut, quamvis contrarii possibilitatem inficiari nequeat; de ea tamen ferè nil cogitet, nec magis perturbetur, quām si esse nullam putaret.

9. Et verò haud difficile factu esse, ut sedulus quilibet vitæ interioris Professor persuasionem ità practicè, & moraliter certam de sua cum DEO amica conjugatione habeat; vel solis sat posset sanctorum Patrum testimoniis probari. Audiatur D. Basilius: *Quomodo ( inquit ille ) certò persuasus esse aliquis potest, quod Deus ei peccata dimiserit ? respondetque, securum de hoc esse posse: Si affectionem in se anima senserit, similem illius, qui dicebat: iniquitatem odio habui, & abominatus sum. ( in Reg. brev. inter. 12. )* Audiatur D. Joannes Chrysostomus, qui, recitato illo Apostoli dicto: *ipse spiritus testimonium reddit spiritui nostro, quod sumus filii DEI:* hanc inde conclusionem eruit: *Quando verò spiritus testatur, quānam relinquitur ambiguitas ? ( Hom. 14. in Ep. ad Rom. )* Audiatur D. Augustinus super Psalmum 84. ubi exhortatur veros fideles, ut fidenti animo compotes

gratiæ sanctificantis se existiment: *Dicat unus quisque fidelium, sanctus sum. Non est ista superbia elati, sed confessio non ingrati.* Audiatur D. Leo Magnus, qui dubitare nos vetat, num DEum in anima habeamus præsentem, quandocunque aliquod ex propriis illius effectis, ac vestigiis in ea deprehenderimus. *Discutiant se fidelium mentes, & intimos cordis sui affectus vera examinatione dijudicent: ut, si depositum aliquid in conscientiis suis de fructibus charitatis invenerint, DEum ibi inesse non dubitent.* (Serm. 2. de fest. Pasch.) Audiatur demum D. Bonaventura, qui secundum nostram distinctionem pronuntiat: *dicendum, quod quamvis de meritis non habeatur certitudo per scientiam necessariam; haberi tamen potest certitudo per probabilem conjecturam, & per quamdam ipsius bona voluntatis confidentiam, qua consurgit ex conscientia.* Puritas enim conscientia, quæ introducitur per expulsionem culpæ, dat ipsi animæ quamdam securitatem, & certitudinem de merito jam inchoato, & per consequens certitudinem de premio consequendo (in 3. dist. 26. a. 1. quæst. 5. ad 1.).

10. Sed & ad manum est ratio, quæ idem planum faciat, dummodo causæ advertantur, unde posset contingere, ut quipiam nesciens cæteroqui divinâ gratiâ careret, quæque ideo omnium in præsenti materia dubitationum, timorūmque fons sunt. Hæ verò, ut quilibet videt, duæ esse possunt: vel scilicet, quod aliquis aſſecu-

secutus veniam culparum non sit , quas  
alioqui se novit patrâsse ; vel quia , esto il-  
larum venia donatus , aliam quamquam sibi  
occultam patraverit . Neuter horum even-  
tuum impossibilis est : non prior ; quamvis  
enim confessio ritè instituta nullis non cri-  
minibus abolendis par sit ; unde tamen con-  
stare nobis potest in confessionibus , quas  
peregrimus , nihil ad legitimum valorem  
necessarii defuisse : seu vitio ministri pœ-  
nitentiæ , qui haud potuerit , volueritve  
nos absolvere , seu nostro , qui admissas ei  
culpas , nec omnes , nec debito cum do-  
lore exposuerimus ? Sed neque posterior :  
cùm nulli hominum certò , atque eviden-  
ter noti esse possint singuli quique interio-  
res sui actus . Quod & propria cuique ex-  
perientia demonstrat ; & unanimi confirma-  
tur testificatione tum Apostoli , de se ipso  
scribentis : *Nihil mihi conscius sum , sed non in  
hoc justificatus sum.* ( *I. ad Cor. 4.* ) tum Regii  
Prophetæ , qui perturbatus , pavénsque ad  
Deum clamat , ( *Ps. 18.* ) *delicta quis intel-  
ligit ? Ab occultis meis munda me ;* tum D. Au-  
gustini , ubi posse aliquid criminis in angu-  
lo quoquam nostræ conscientiæ latere , ait ,  
quod nobis incognitum acutior DEI visus  
perspiciat , ( *Serm. 23. de verb. Dom.* ) *tu non  
vides peccatum : fortè Deus videt , qui melius vi-  
det.* Si ergo hic ostendam , prædictorum  
eventuum possibilitatem non ultrà valere ,  
quam ut absolutam ; & omnimodam divi-

næ

næ gratiæ certitudinem sanctiorem vitam professis tollat; an non simul ostendero, posse hos nihilominus practicam, moralèmque obtainere de sua cum DEO amicitia certitudinem: certitudinem scilicet, quæ illos trepidis de sorte contraria dubitationibus inquietari non sinat? Ita planè, ut nemo non videt. Age igitur, proposita rei demonstrationem à primo capite exorsi aggrediamur.

II. Incertus sum, dicit quispiam, num Sacramenti pœnitentiaæ administer, qui peccata confitentem me audiit, seu legitimè initiatus Sacerdotio fuerit; seu voluntatem me ab iis absolvendi habuerit? Neque insuper mihi constat, utrùm plenè, integréque, & cum eo, quo par erat, supernaturalis doloris sensu mea illi delicta aperuerim? Priusquam objectioni planius respondeam; statuo, ceu doctrinam apud omnes certissimam, licet unam fors aliquis, plurésque confessiones ex quocunque defectu irritas, imò etiam sacrilegas pridem obierit; si tamen deinde ad pœnitentiaæ tribunal, & legitimum ejus ministrum rite præparatus, cùmque universalis suorum omnium criminum detestatione accedat; esto irritarum ejusmodi confessionum delicta contra suam culpam ignorans, vel oblitus, tunc repetere omittat; nihilominus ab iis quoque, tanquam in generali suo dolore comprehensis per Sacerdotalem sententiam ab-

absolvi: plenāmque anteactæ totius pravitatis suæ remissionem obtinere, & in pristinam cum DEO gratiam restitui. Hoc itaque extra controversiam posito, circa dubitandi occasionem è ministro Sacramenti petitam, respondet Franciscus Suarius, ubi quis apud alios, atque alios Sacerdotes confessus malefacta sua est, déque nullo eorum justam timoris causam habet, ne legitima se absolvendi potestate, aut voluntate caruerit; certum esso moraliter posse, quòd saltem ab aliquo ex iis valida, & efficax sibi fuerit impertita absolutio. *Tunc enim, licet generatim loquendo, in uno vel altero possit defectus, seu deceptio timeri; tamen moraliter videtur impossibile, quòd inter tot ministros nullus fuerit & verus Sacerdos, & fidelis in ministando. Est ergo tunc moralis certitudo de validitate Sacramenti ex parte ministri in aliqua absolutione: licet in particulari in hac, vel illa determinatè non sit tanta certitudo.* (Tom. 3. de gr. l. 9. c. II. n. 7.) Quantum verò ad conditiones, quas afferre necessariò ipse pœnitens debet, néve non attulerit, & frustratus propterea Sacramentum sit, timeri potest; aliæne tandem illæ sunt, nisi ut conscientiæ suæ lateras solerter scrutatus, si quid ibi capitalis culpæ nondum expiatum deprehenderit; & commisisse ex animo doleat, & Sacerdoti candidè aperiat? Non aliæ profectò. Quænam ergo illarum tam difficilis paratu est, ut quisquam Christianæ perfectionis cultor

su-

suspicari probabiliter possit, in nulla ex tot confessionibus, post sanctioris vitæ initia à se obitis, eam sibi adfuisse? Num sincera, & fidelis noxarum memoriæ occursum expositio? Atqui adeò perspicuum cuique est, ullamne, cùjus recordaretur, capitalem noxam sciens, volensque in Sacramento reticuerit; ut factum id, an non factum à se sit, juratus affirmare post confessiones singulas queat. Num igitur (quæ altera est conditio) summus, atque intimus de patratis criminibus dolor? At enimverò, & liberrimum cuvis volenti est sic dolere; & ipse voluit, conatusque est, quantum in se erat, id agere: neque dolor praedictus rara adeò, & laboriosa res est; ut credibile videatur à DEI famulo, quantumvis volente, & conante, nunquam fuisse in ulla tot suarum confessionum pro eo, ac necessum erat, conceptum. Alioquin quid de vulgo fidelium fieret, cùjusve ex iis speranda esset salus; si etiam ii, qui perfectiori vitæ operam navant, nunquam poenitentiae Sacramentum, etsi ad illud se parare diligenter studuerint, cum idoneo, & sufficienti dolore susciperent? Ah credi non potest, DEUM voluisse, ut tam difficile & ambiguum humano generi esset remedium, quod cæteroqui adeò illius fragilitati erat necessarium ad æternam consequendam salutem: habendumque ideo pro eventu moraliter impossibili est, quod, qui à pluribus retro

retro annis peculiarem DEI famulatum profitetur: omnésque illius graves offensas solertissimè vitat, quin & ordinarias, & leves frequenti confessione eluit: ne semel quidem tanto temporis tractu sacram exomologesim peregerit cum ea præparatione animi, quæ ad superioris vitæ culpas delendas, & recuperandam DEI gratiam sufficeret. Ità certè sentit citatus paulò antè Suarius: affirmans, ubi quispiam longo tempore cum peculiari æternæ salutis, & spiritualis profectūs sui cura vixerit, pœnitentiæque interim mysteria frequentarit cum eo, quem sat esse arbitratur, interiore paratu; esto de peculiari quapiam confessione dubitare secum possit, num valida, & efficax fuerit; haud tamen de omnibus posse idem dubium prudenter concipere. Tunc enim, licet talis homo in una, vel altera confessione habitare possit; tamen in confuso moraliter est valde certus, aliquando rite confessum esse. Ergo hoc satis est, ut talis homo cum magna fide morali judicet, se aliquando amissam gratiam recuperasse. (ibid.)

12. Imò tam verum id est, ut re probè aestimata nulla mihi occurrat ratio, cur virius, præsertim non indoctus, si ad interiores suos actus velit mentem advertere; nequeat de peculiari etiam quavis confessione esse moraliter certus, quòd eam cum sincero de offensis divinis dolore, & firme melioris in posterum vitæ proposito obierit.

Nam

Nam & curam adhibuit, ut prædictos actus conciperet; qui faciles cuivis homini sunt, qui vel mediocriter in DEI cognitione, & amore profecerit. Quidnam igitur cauſa est, cur dubius animi pendeat, num eos re ipsa conceperit, nec potius conceptos à ſe esse pro certo habeat? Ne id eſſet imitari quodammodo ſcepticorum recordiam, qui nihil usquam certi ſtatuentes dubitabant, noſſentne revera, quæ noverant, & vel- lēntne, quæ volebant, philosophandi ra- tione prorsus homine indigna, & ipſiusmet ſenſūs communis experte; quo quisquis præditus ſit, ac rite utatur, intelligere fa- tis potest, aliquidne velit, aut nolit: præ- fertim ſi ejusmodi affectus non temere, obi- téque in illius animo exoriantur, ſed ipſe- met ad eos concipiendos ſedulam ultrò ope- ram, ſtudiūmque adhibuerit.

13. Adjice huc: quòd, licet anxius eſſe aliquis pergeret de ſuarum confeſſionum ef- ficacitate, & valore ob clandestinum for- quodpiam ministrorum, à quibus ibi abſo- lutus eſt, vitium; habet tamen aliam quivis DEI ſervus rationem, qua cer- tior fieri de ſua cum cæleſti Domino ami- citia poſſit: auctum videlicet perfectæ cha- ritatis, unde ad crimina omnia, quibus eum offendit, ſummopere deteſtanda, & odio habenda impellatur. Nam & qui- libet hujusmodi auctus ſatis per ſe eſt, ad hominem, qui DEO exodus foret, cum eo

eo reconciliandum; & illorum complures ab hominibus, divinæ consuetudini deditis, partim in pœnitentiæ Sacramento, partim etiam in quotidiana oratione exerceri solent. Quamobrem facillimè hi possunt omni procul dubio statuere, in DEI sese amicitiam saltem per eorum aliquem restitutos jam esse. Neque aliquis fors objiciat, perfectæ charitatis actus arduam plus nimiò, nec nisi perpaucorum rem esse. Per tot siquidem annorum millia, quot à primo mundi exortu ad usque Christi mortem fluxerunt, unica hominibus ratio, quâ patratorum à se criminum remissionem consequi possent, fuit eorum pœnitentia, & detestatio ex Theologicæ charitatis impulsu. Si itaque adeo id factu arduum ipsissimam perfectionis Evangelicæ cultoribus foret, quotusquisque scelerum veniam, & reconciliationem cum DEO promeruisse, ante divini verbi in terras adventum, quando etiam justi, piique homines neutiquam profitebantur vitæ genus tam sanctum? Væ humano generi ab opinione prædicta! quæ idcirco repudianda vel uno hoc nomine est, quod cum divinæ bonitatis injuria ex cogitata sit, durè adeo eam nobiscum egisse, ut, quo tempore minor in mundo veritatum supernaturalium intelligentia, & cœlestium auxiliorum copia erat, nullum esse aliud peccantibus sempiternæ salutis obtinendæ instrumentum voluerit, nisi quod

O

ob

ob nimiam difficultatem etiam inter eos rassisimum sit , qui sub lege Evangelica vivunt, uberiori rerum divinarum luce illustrati , & amplioribus cœlestis gratiæ subsidiis adjuti. Sed omissa etiam hac ratione , & rem ipsam suis duntaxat momentis inter nos ponderando, quænam , rogo , difficultas occurrere homini potest jam diu vitam spiritualem profitenti , ne ita secum ratiocinetur ? DEUS , prout indubitatisimis non solum Christianæ fidei , verùm etiam rationis humanæ testificationibus constat , infinita adeò perfectione , bonitate , & pulchritudine excellit , ut à nostrûm quolibet plus longissimè diligi mereatur , quàm aliud quodvis objectum , aut nos ipsos diligamus. Cùm ergo tale illius meritum sit , & ego pro arbitrii mei libertate ità amare illum possim , quidni etiam velim ? volo sanè : paratissimus ideo prius bonorum quidlibet repudiare , & malorum subire ; quàm illum , cæteris mihi rebus universis , méque ipso chariorem offendere. Et quia ipsum infinitæ amabilitatis suæ causâ sic diligo ; odi , ac detestor , supra quidquid detestabile est , meam in tali Domino toties offendendo perfidiam , plusque de hac doleo , quàm de meo quovis malo dolorem : fixum propterea , & deliberatissimum in animo habens creati nullius seu boni amore , seu mali metu eum deinceps offendere. Quænam , dico , tam extraordinaria difficultas obstare ulli servo

DEI

DEI potest, ne hujusmodi actus velit concipere, ac volens, utpote arbitrii sui potens, concipiatur? Cürve illum stupidæ adeò mentis fingamus, ut ad suam voluntatem paulò attentiùs respiciens minimè advertat, hanc re ipsa sic affici, sèque ideo perfectæ contritionis actum edidisse: vi cuius, tametsi præteritæ omnes suæ confessiones ob ignotum sibi aliquod crimen cassæ, atque inanes fuissent; amissam peccando DEI gratiam recuperaverit, inque præsens amicus ei sit? Ego certè non video, quid tantæ hic obscuritatis homini, naturalis sensus compoti neque scepticam Philosophiam professo, ac se ultro excæcanti supersit. Quòd si nihilominus aliqua dubitandi ratio circa hunc, vel illum ex actibus prædictis occurreret; nulla certè Suario judice apparet circa eos universos: adeò ut probabile videri possit, inter tot contritionis actus, à fideli quopiam DEI famulo post suam ad eum conversionem quovis ferè die repetitos, nullum omnino verum, integrumque, & satis efficacem fuisse. Si ponamus hujusmodi hominem (ita Doctor citatus) sapius in vita vel quotidie per multum tempus iterare actus contritionis, faciendo, quantum in se est, & quantum ipse assequi potest, perseverando diu sine conscientia peccati mortali; non videtur possibile, quin aliquando veram contritionem eliciat, suppositis principiis certis de gratia Dei, & promissionibus ejus, quas habemus. (ibid.)

O 2

14. Su-

14. Supereft jam, ut secundam dubitatum, & timorum in praesenti materia radicem studeamus evellere: demonstrando, neque possibilitatem mortiferi criminis, in quod aliquis post ultimam confessionem ignoranter labi potuerit impedimento esse, quo minus DEI servi eandem de praesenti sua integritate, ac proinde amicitia cum DEO retinere in suis animis practicam, & moralem certitudinem queant. Neque id demonstrare ullius negotii res est: nam ad culpæ capitalis reatum, ex communi Theologorum sententia, necesse est, ut, qui illo se obstringit, ( si cæteroqui timens DEI est, nec offendere illum graviter sollet ) deliberatè, ac plena cum animadversione id faciat: rem scilicet vetitam volens, tametsi & vetitam à DEO esse, & à se tunc ultrò appeti intelligat. Jam vero, quamvis evenire possit, & revera per quam sæpe usuveniat, ut homines perdite impii, quibusque ideo mos est, exforberet iniquitatem, sicut aquam ( Job c. 13. ) deliberatè, scienterque peccatum velint, & tamen ob summam rerum spiritualium incuriam aliò statim mentem avertant, nullam in memoria retinentes perversæ voluntatis suæ speciem, secundum quam illud fuisse à se volitum, affirmare dein possint; quis tamen crassam adeò conscientiæ stupiditatem suspicari queat in animabus, Christianæ perfectionis studium professis, quæque nihil seu pluris amicitia DEI fa-

ci.

ciunt, seu magis quam ejusdem offensam perhorrescunt? Nimis ah, nimis experitus in animabus hujusmodi viget sensus, adeo & insolentis sibi accidere, & detestati à se mali, ut est culpa lethalis: tantumque absunt à nulla retinenda illius certò, & scienter admissæ memoria, ut vel tenui ejus dubio sollicitatæ, nullum faciant examinationæ rei finem, nec prius ab infixis molestissimarum anxietatum stimulis quiescant, quam de sua sibi innocentia constiterit. Non aliter, quam cutis obdurata, & callosa, et si graviter percutiatur, parum dolet, & dolere citò desinit: at pupilla oculi, ut pote delicatior, & leviculam quamvis offensionem acriter persentiscit, & dolorem inde haustum diu pergit manantibus lacrimis prodere. *Multum differt* ( dictum à Dominō est Seraphicæ suæ sponsæ Teresiæ, gratâne, an invisa illi foret, aliquando solicitæ ) *multum differt lux à tenebris: nemo inscienter peribit* ( in Append. ad Relat. vit. ) Circa allata verò superiùs sanctorum testimonia, quæ contrarium videbantur asserere, dico, vel sermonem ibi fieri de peccatis venialibus, quorum plura, fateor, à spiritualibus etiam virtus committi, quam adverti: vel, si de mortiferis quoque accipienda sint, nihil inde amplius evinci, quam absolutam possibilitatem, ut grave aliquod crimen admittatur sine ullo ejus morfu, atque stimulo in conscientia superstite. Quod tamen haud obstat, quin sanctioris vitæ professores

quandocunque nullo hujusmodi morsu , atque stimulo vellicantur cum plenissima probabilitate , imò & morali cum certitudine possint inde arguere , nullo gravis culpæ reatu se obstringi : dicentes cum Apostolo , & Evangelista Joanne : *Si cor nostrum non reprehenderit nos , fiduciam habemus ad eum ( Ep. I. c. 3. )*

15. Atque hoc loci coarguendus mihi nonnullorum error se offert , piorum cæteroqui hominum , & Christianæ perfectiōni studentium , qui , dubitatione interdum suboriente , num dæmoni ad peccandum solicitanti interiorem assensum præbuerint ? quamvis possint majori cum probabilitate contrarium apud semet ipsos statuere ; tūtiū tamen , & spiritualis vitæ regulis congruentiū putant , se ibi damnare , quām absolvere : controversiāmque vel penitus indecisam relinquunt , vel in ea dijudicanda dæmoni potiū , & peccato , quām innocentiae suæ favent : neutiquam interea animadvertentes gravissima detrimenta , & incommoda , quæ ex hujusmodi adversum se iniquitate sibi proveniunt , ac præsertim hæc tria . Primum , quòd ad scrupulosa , & futile dubia circa bonitatem , & malitiam suorum actuum mentem affuefaciunt , non audentes ferre sententiam , nisi de rebus omnino manifestis , facilēs que perturbari ad primam quamque falsi juxta , ac veri criminis speciem , & nullis

non

non in suis rebus ad deteriora credenda proclives: non sinè periculo, ubi dubium occurrat circa res agendas, seu peccandi ex practici judicii defectu, seu ex tutioris partis studio ea faciendi, quæ fatuitatis specie risum sapientibus moveant. Secundum: quòd lethalis culpæ horrorem suo sensim in animo obtundunt, ac minuunt: non eam ultrà spectantes, velut facinus improbitatis portentosæ, & quod vix credibile videatur, posse ab ullo sanæ mentis homine admitti: sed potius, quasi humanae quemdam imbecillitatis lapsum adeò videri ubique obvium, tamque rarum, & difficile à quoquam vitari, ut censeri quodammodo proprietas, & natura hominis queat. Tertium: quòd à sua istiusmodi consuetudine deducantur, paulatim in perniciosissimam quamdam dissidentiam, & propemodum desperationem, integros fere à mortiferis quibusque noxis tuendi; dum post decretam toties in animo earum fugam, totque artes ad hunc finem obtainendum adhibitæ, irritos cadere sibi persuadent suos omnes conatus, nec ullum labi diem, quin nescientes quo pacto, & vix non coacti in earum aliquam decidant. Quæ persuasio neminem fallit, quantum impedimenti afferat, ne certum, atque efficax concipiatur, nunquam graviter delinquendi propositum. Cùm è contrario, si inferendo de se ipsis judicio ea uterentur æquitate,

O 4

quam

quam erga omnes alios servandam sibi esse intelligunt, haud fese condemnantes offensi graviter Numinis, quando probabilior iis suppetit ratio, ab immani adeo reatu absolvendi, & usum sibi compararent decidendi prudenter conscientiae sue causas, rem sanè maximi tum ad rectam vivendi rationem, tum ad tranquillum animi statum momenti; & gravem DEI offensam, instar mali concipientes, quod pro extrema sua deformitate, & perniciose portento simile videatur, posse à quoquam rationis compote eligi; tantò illam vehementius perhorrescerent: tantò minus excusabile, veniaque, & miseratione indignius censerent, ejus se reatu illigare: tanto denique firmius deliberatum haberent, terrimam illius labem, quam divinæ gratiæ auxilio, & præterita intentione feliciter à se vietatam, & in quavis alia per facile vitabilem esse crederent, in perpetuum animo excludere.

16. Quibus confirmandis haud parvo usui esse potest mirabile exemplum, à Rosweido in Appendice ad Patrum *vitas* relatum. (p. 995. sub tit. *Pall. Lauf.* c. 20. n. 16.) Aquandi necessitas pium eremi incolam sua compulit è cella egredi: sed egressu maximè infausto; nactus quippe occasionem admodum lubricam, sustinere se nescivit: quin lethale in crimen decideret. En autem vix prolapso instare acriùs dœmon, nec spacium resurgendi permettere, sed omni ope conniti, ut ex fovea luxuriæ in de-

spe-

sperationis baratum præcipitem daret: sugg  
gerens, ut, quando apud DEUM jam con  
fregisset tesseram, tantique temporis in ere  
ma exhausti labores uno die perdidisset;  
tetricum illud vivendi genus, quod male  
adeò sibi cesserat, tandem missum faceret,  
& ad hilariorem in medio hominum vitam  
se referret, fruiturus ibi per otium vo  
luptatibus, quarum modò gustum cepe  
rat. Oppugnatio perquam validèurgebat,  
nihilque proprius factu erat, quam ut infe  
lix Monachus nequissimæ suasioni manus da  
ret, & nimia mentis confusione excæcatus  
in ultimam provolveretur ruinam. Sed  
periclitanti divina lux in tempore adfuit,  
quæ doceret, sublevandi animi, & noxii  
mœroris abigendi causâ, à recentis pec  
cati cogitatione, quoad immodica illa per  
turbatio resedisset, mentem averteret. Col  
ligens se itaque, posteaquam (ut credi par  
est) perfecta contritione, & confessionis  
suo tempore obeundæ proposito, in pri  
stinam cum DEO amicitiam redierat; heus,  
ait, quænam importunæ, vanæque species  
mihi mentem exagitant? cur despero? Qua  
de re æger animi sum? Quòd noxam capi  
talem admiserim? Apage imaginationes fal  
sissimas, & mera vigilis somnia. Egóne ut  
graviter Deum modò offenderim, quem nullis  
non rebus chariorem habeo, & cuius gratiâ  
paratus sum vitam millies profundere. Nullo  
modo id fieri potuit? Nunquam adducar, ut

O; fa-

factum credam. *Non peccavi, iterum dico, non peccavi.* Per lepidam hujusmodi inventiōnem recreatus ab exuperanti, & desperabun-  
do mōrore ad suam cellulam rediit, con-  
fuetāque ibi cum alacritate ordinariis exer-  
citionibus suis fungi perrexit, tanquam  
si nihil novi evenisset. Neque non provi-  
dum, & salubre id illius consilium fuisse,  
spirituali ejusdem magistro aperuit DEUS  
revelans homini generatim, suum illum  
discipulum de hoste tartareo, à quo victus  
primūm fuerat, insignem mox victoriam  
retulisse. Profectus hic ergo ad alumni sui  
cellam, ut rem totam enucleatiūs cognosce-  
ret, cùm prima inter verba, sat in salvæ?  
interrogāsse; ità Pater, responderi ab eo  
audiit. Nihilne igitur his diebus pertur-  
bationis, tristitiaēque expertus in animo es?  
Nihil, DEO adjuvante, alter subjicit. At  
quonam id pacto, cùm DEUS hæc mihi de-  
te revelaverit? Age itaque, excepit Mo-  
nachus, quando rei summam divinitus nō-  
sti, eus quoque seriem, ac modum tibi  
candidè aperiam. Nec plura, & quidquid  
sibi acciderat, ut primò lapsus esset, quā-  
que mox ratione à casu resurrexisset, spe-  
ciatim exposuit, non sīnē magna senioris ad-  
miratione, qui Authori bonorum omnium  
gratias de eventu illo agens, concludit:  
*certè, frater, discretio tua contrivit virtutem  
inimici.* En ergo pulchrum stratagema, quo  
simplex hic DEI servus periclitanti suæ sa-  
luti

luti consuluit. In apertum ille crimen corruerat, & tamen illud sibi inficians, ne à tristitia inde exorta in desperationem ageatur, providit. Nec de hujus remedii usu reprehensus à DEO est, sed potius pro bona sua fide, ac mente laudatus. Cur igitur vir spiritualis, & amicæ cum DEO conjunctioni deditus, ubi certus de admisso crimine haud est, imò potest majori cum rationis specie insontem se credere; consultius factu existimet, illud sibi imputare: neque contra noxiorum effectuum respectu, quos oriri inde vidimus, in hujusmodi dubiis prudentius videatur facturus, si pro parte solidioribus fundamentis nixa, sua nimirum integritate, ferat sententiam? Generalem solummodo de totius vitæ suæ noxis actum contritionis eliciens; déque casu præsenti, tanquam de re minimè dubia, apud se dicens: *Non peccavi, iterum dico, non peccavi.*

17. Scio, approbandi, tuendique contrarii moris causâ, proferri à nonnullis solere celebrem illam D. Gregorii sententiam, (l. 12. Reg. Ep. 31. ad inter. 10.) *Bonarum mentium est, ibi etiam aliquomodo culpam agnoscere, ubi culpa non est.* Sed minimè ad rem: aliud quippe est bonas, hoc est, salutis æternæ studiosas, & timentes DEum animas, nisi prædicta earum bonitas convenienti prudentia gubernetur, solere præculparum odio, ac formidine eas, & ubi non

non sunt, sibi fingere, quod unum à D. Gregorio ibi affirmatur; aliud verò, vanas culpæ imaginationes, quas illis prudentiæ expers bonitas suggerit, esse rem per se bonam, atque utilem, & pro tali suadendam: quod neque sancto Pontifici dicere unquam venit in mentem; neque ullus mentis cordatæ, hoc est plus quam simpliciter bonæ, vir dixerit. Quemadmodum morbos item esse, quosdam scimus, robustorum corporum proprios, nec molestiam facessere imbecillioribus solitos: quos tamen nemo dixerit corpori utiles, quia ex bona, hoc est valida constitutione originem ducent. Denique nihil visu crebrius occurrit, quam mali effectus à causis, bonis quidem, sed non ritè, ac convenienter temperatis producti. Usque adeò ipsum met bonum, si congruenti mensura, & temperie careat, noxiū evadit.

18. Cùm ergo interiores DEI famuli, seu demonstratum hucusque est, & certi esse moraliter possint de sua cum cœlesti hero amicitia; & ex certa, quietaque hujus persuasione plurimū alacritatis capiant, ad proficiendum in ejus amore, ad libentius cum eo conversandum, & ad illi serviendum impensiūs, concludo, eos sibi melius consulturos, si quantū ad hoc, nulla perturbentur anxietate, & formidine propter absolutam possibilitatem contrarii: sed, quamdiu nulla suppetit peculiaris, & prudens

dens de illo ambigendi ratio, pro certo præticè habeant, divina sese gratiâ potiri, & securò, ac gestienti animo in tam felici sua sorte acquiescant. Confirmatûrque id communi sapientum virorum exemplo: quos cernimus, ubi de hoc, vel illo suo bono certitudinem nocti sint, quam rerum humanarum natura, & conditio suscipit, ea contentos penitus vivere, neque de metaphysica contrarii possibilitate, quidquam plus cogitare, & solicitudinis capere, quâm si illa omnino nulla esset. Quòd si aliquis secùs agat, neque communi illa securitate contentus sit, sed anxiè secum reputans, haud esse omnino impossibile, ut contrarium accidat; nullumque finem faciat, novis se adversus illud, & extraordinariis muniendi præsidiis, derisi vulgò est, pérque ludibrium in ora hominum abit, tanquam fatuæ timiditatis ostentum. Qualis exempli gratiâ Artemon ille fertur fuisse. (*Plut. in Pericle.*) qui cogitans, quâm multa delabi supernè in caput possint, nunquam prodibat in publicum, nisi firma tectus lecticâ: imò & domi à duobus servis prætendi suprà caput curabat. Atque hinc fit, ut, quamvis nulla nobis certa omnino adsit de nostri valore Baptismi scientia, cùm tamen ille sat probabilis sit, non solent vulgò homines de re tanti momenti plûs admodum cogitare, aut solicii esse, quâm si extra omne dubium ea foret. Idémque observa-

re

re fas est in aliis rebus humanis : ubi nemini certò constat , haud fore , ut domo exiens à furioso quopiam homine districto mucrone appetatur ; vel domi manens terti repente collabentis ruina obruatur : & tamen, quòd ejusmodi casus merè possibles sunt , nec ullum præsens , ac peculiare indicium sui exhibit ; nemo vir prudens in iis anxiè recogitandis moratur : sed omnes potius inter eorum discrimina securi adeò agunt ; ut securiores non agerent , si ex revelatione divina agnovissent , nunquam sibi esse eventuros. Si ergo circa hos , aliósque ejusdem generis casus cordati qui que homines tali esse animo solent ; cur aliter animatus quisquam esse in præsenti nostro casu debeat , ubi longè probabilior , & certior , quàm in allatis modò exemplis securitatis ratio se offert? Cúrve híc etiam abigendæ non sint , tanquam supervacuæ , imò tanquam insuper noxiæ , quæ sinè ulla peculiari , & justa ratione ob meram incerti mali possibilitatem in animo exorirentur formidines ? Num quia ad intentiorem contra malum diligentiam hominem stimulant ? At quis ignorat , diligentiam & in laudatissimis studiis esse posse imprudentem , & nimiam : ac proinde , ubi tales , atque tantam híc prompserimus , qualis , & quanta adhiberi à prudentibus DEI famulis solet , & ad constituendam moralem certitudinem sufficit ; æquum esse ,

ut

ut sollicitis, anxiisque illius stimulis modum aliquando ponamus: ne, si scrupulosa sedulitate tutiores usque fieri, ac tutiores conemur; instar commemorati suprà Artemonis fabula, & jocus sapientibus simus. Præterquam quod post ulteriora quævis studia, & conamina, metaphysica terrentis mali possiblitas etiam tum permanebit: sempérque in carceribus nostri stadii erimus, neque absolutæ certitudinis compotes, neque practica, morali fruentes, nullumque aliud ferè nacti inconsultæ diligentiae pretium, nisi anxietatem perpetuam: quæ, quantò cor angustabit magis, tantò minus expeditum relinquet, ad percurrendas divinæ charitatis vias, ubi cordis latitudo præcipuum est progrediendi subsidium; ut de se David testatur, DEO canens: (*Ps. 118.*) *Viam mandatorum tuorum cucurri, cum dilatasti cor meum.* Quantò itaque providentioris consilii fuerit, ut, si cui constare moraliter potest, revera DEI amicum, atque filium se esse, pro tali is se habeat, & gerat? in id unum suas omnes curas intendens, ut in illius amicitia magis semper, ac magis proficiat: & crebrò detestans, quæcunque adversus eum perpetravit delicta; non quidem ex timore, ne illorum culpa etiamnum in se duret, & deleri pio ejusmodi dolore indigeat, sed ex puro exercendi, quemadmodum per alios plures actus, minimè cæteroqui necessarios, sic etiam per hosce sui erga illum amoris stu-

studio. Quo pacto quæsitam à timore expulsionem culparum, & divinæ gratiæ securitatem tantò assequetur certius, quanto pœnitentiæ actus citra omnem timoris impulsum ex mero DEI respectu editi, minus dubitari potest, quin ad eam charitatem pertineant, quæ operit multitudinem peccatorum, vel una per se in justum ex impio, inque DEI amicum ex inimico hominem mutans.

19. At fortasse dicet hic aliquis, cum recentiores hæretici hac in materia modum omnem excesserint, statuentes, pro certissimo fidei dogmate habendam Christiano cuique homini esse suam cum DEO amicitiam; tertiūs videri, si quam longissime fieri potest, ab eorum temeritate abscedamus, omnem prorsus damnando, etiam practicam, & moralem illius rei certitudinem. Talis est nonnullorum opinio; sed judicio meo parum solida, eorumque magis propria, qui solam rerum speciem attendant: quam qui easdem penitus introspiciant, inque trutina rationis examinent. Neque enim semper modus maximè idoneus revocandi ab uno extremorum homines est violenta ad aliud contrarium impulsio. Sed non raro contingit, ut ab extremo, ad quod quis reluctans propulsus fuit; facilius, libenterque ad alterum transeat, quam ex medio utriusque interjecto transisset. Quin imò probabile mihi admodum est, temerariam hæreticorum sententiam de summa circa divinæ

gr<sup>o</sup>

gratiæ possessionem certitudine , vel ortam primò esse , vel , quò latius propagaretur , adjutam à nimium timidis hujus , illiusque orthodoxi Authoris sententiis , de nulla omnino , vel minima circa id certitudine . Nam cùm permulti cor sibi violenter comprimi à summa illa in re tanti momenti ambiguitate sentirent , neque eam ullo pacto verisimilem arbitrarentur ; horrere , & aversari duras adeò sententias cœperunt . Unde factum est , ut horrore hoc impulsi , quām longissimè poterant , ab iis se reducerent , neque in moderatiori alia , & finitima iis sententia consisterent , sed ad illam , quæ omnino , & maximè erat contraria , transgrederentur . Quemadmodum , qui à termino quopiam magna vi resilit , non solet in illius vicinia hærere , sed , quandiu impetus , per quem inde repulsus est , manet , pergit ab eo semper longius recedere . Et revera Lutheri satelles Chemnitius , quò Tridentinam Synodum vendibilius impugnet ; cogi ab ea homines fingit ad perpetuò , & usque quaque ambigendum de divina in suis animis gratia , invidiosè exclamans ; *Qualis est illa doctrina , cuius effectus , summa , & finis est , ut anxiæ conscientiæ quarentes consolationem , rejiciantur in perpetuas hæsitationes , & dubitationes suæ cum DEO reconciliationis , salatis , & vitæ aeternæ !* Quæ illius exclamatio majorem vim haberet ad creandam apud vulgus invidiam definitionibus sacræ illius Synodi ; si nos quoque au-

P

dien-

dientes damnari ab ea summam de divina  
gratiæ possessione certitudinem , qualis est  
certitudo fidei ; perperam inde argueremus ,  
summam contrà ab eadem circa id ambigui-  
tatem præscribi . Quamobrem sapienter  
Bellarminus respondet , egregiè hallucinari ,  
seu verius impudenter calumniari hominem ,  
dum prædicat , à Concilii doctrina nos cogi-  
ad ducendam in perpetuis hæsitationibus ,  
& conscientiæ angoribus vitam ; cùm non  
desint ex Catholicis Authoribus plures , qui ,  
quamvis jurati in Tridentinæ Synodi verba ,  
doceant nihilominus , posse hominem eò se-  
curitatis circa præsentem suam justitiam per-  
venire ; ut , licet dubitare de illa queat ,  
tamen nîl dubitet : neque ideo opus cuiquam  
esse , in omnimoda vel securitate , vel anxie-  
tate , tanquam nihil præterea eligendum oc-  
currat , ævum traducere : sed inter duo hæc  
extrema , tertium , mediūmque adhuc su-  
peresse practicæ , & moralis certitudinis sta-  
tum , in quo veris DEI servis tranquillissimè  
liceat , quasi in quodam terrestri paradiſo  
quiescere . ( *de justif. l. 3. c. 11.* ) Neque enim  
bona est argumentatio : *Catholici non habent cer-*  
*titudinem fidei de sua justificatione ; igitur semper*  
*dubitant , harent , anxi sunt.* Sicut neque  
contrà rectè quis concluderet : *Catholici non sunt*  
*anxi , neque hæsitant de sua justificatione ; ergo*  
*certi sunt certitudine fidei , remissa sibi esse pecca-*  
*ta.* Datur enim aliquid medium inter hæc extre-  
ma , videlicet certitudo quadam moralis ex parte  
in-

intellectus, & spes, ac fiducia ex parte voluntatis. Hanc igitur certitudinem libenter agnoscimus, quæ non oritur ex præsumptione imputata justitia, neque est certitudo fidei Catholicae: sed oritur ex charitatis, & bonorum operum experimento, ac per hoc moralis, & conjecturalis certitudo appellari potest: ita Bellarminus. Tantum igitur à vero abest, debere nos, quia hæretici cuius fidelium summam, & falli nesciam de præsenti sua justitia certitudinem tribuunt, omnem prorsus de eadem certitudinem tollere; ut potius hoc pacto ansam iis præberemus abalienandi se magis à doctrina Catholica, suóque in errore pertinaciùs hærendi: at contra justam aliquam, & legitimam admittentes fateri eos cogamus, nullam sibi causam, & necessitatem adesse confugiendi ad suum illud extremum, quasi ad unicum pacis asylum: cùm neque Catholicis pacissimum aliud desit in sua, non plūs quidem morali, sed rationi consentanea, & sufficien-  
tialioquin certitudine asylum.

## CAPUT IV.

*Neque sat̄is valere, ad perturban-  
dam nostrā cum DEO conjunctionis jucunditatem,  
quod de perseverantia in eo amando, déque aeterna  
consequenda salure n̄l omnino certi habeamus.*

AT, si fideles DEI servi idoneam non habent  
trepidationis, & anxietatis causam de  
præsenti sua cum illo amicitia; habebunt  
P 2 eam